

NACRT

Na osnovu člana 13. Zakona o principima lokalne samouprave u Federaciji BiH („Službene novine Federacije BiH“, broj 49/06 i 51/09), člana 25. Statuta Općine Stari Grad Sarajevo-prečišćeni tekst („Službene novine Kantona Sarajevo“, broj 20/13), na sjednici održanoj dana _____ 2024. godine, Općinsko vijeće Stari Grad Sarajevo, donosi:

PRAVILNIK

O NAGRAĐIVANJU UČENIKA OSNOVNIH I SREDNJIH ŠKOLA ZA POSTIGNUTE REZULTATE IZ OBLASTI OBRAZOVANJA, NAUKE, TEHNIKE, KULTURE I SPORTA I STUDENATA DOBITNIKA NAJVEĆIH PRIZNANJA UNIVERZITETA U SARAJEVU „ZLATNA I SREBRENA ZNAČKA“

I – OPĆE ODREDBE

Član 1.

(Predmet Pravilnika)

Ovim Pravilnikom utvrđuje se način i uslovi nagrađivanja učenika osnovnih i srednjih škola za postignute rezultate na takmičenjima kao i smotrama koje organizuje Općina Stari Grad Sarajevo, te studenata dobitnika najvećih priznanja Univerziteta u Sarajevu „Zlatna i Srebrena značka“ (u daljem tekstu: dobitnici najvećih priznanja).

Član 2

(Upotreba ženskog ili muškog roda)

Terminološko korištenje ženskog ili muškog roda u ovom Pravilniku podrazumijeva uključivanje oba roda.

II – USLOVI ZA OSTVARIVANJE PRAVA NA NAGRAĐIVANJE

Član 3.

(Pravo na nagrađivanje)

- (1) Pravo na nagrađivanje za postignute rezultate iz oblasti obrazovanja, nauke, tehnike, kulture i sporta za osvojeno I, II ili III mjesto pojedinačno ili ekipno u skladu sa ovim Pravilnikom ostvaruju:
 - a. učenici osnovnih škola, državljani Bosne i Hercegovine sa prebivalištem na području Općine Stari Grad Sarajevo, koji su na općinskim, kantonalnim, federalnim, državnim i međunarodnim takmičenjima ostvarili I, II ili III mjesto, pojedinačno ili ekipno iz oblasti obrazovanja, nauke, tehnike, kulture i sporta u prethodnoj školskoj godini.

- b. učenici srednjih škola, državljani Bosne i Hercegovine sa prebivalištem na području Općine Stari Grad Sarajevo, koji su na općinskim, kantonalnim, federalnim, državnim i međunarodnim takmičenjima ostvarili I, II ili III mjesto, pojedinačno ili ekipno iz oblasti obrazovanja, nauke, tehnike, kulture i sporta u prethodnoj školskoj godini.
- (2) Pravo na nagrade shodno odredbama ovog Pravilnika imaju:
- c. učenici osnovnih škola za postignute rezultate u toku osnovnog obrazovanja za učenike prvog razreda srednje škole koji su u toku osnovnog obrazovanja ostvarili prosjek ocjena 5,00 u šestom, sedmom, osmom i devetom razredu sa primjerenim vladanjem ukoliko nisu ostvarili pravo na stipendiju po istom osnovu.
 - d. učenici srednjih škola za postignute rezultate u toku srednjeg obrazovanja za studente prve godine fakulteta, koji su u toku srednjeg obrazovanja ostvarili prosjek ocjena od 4,80 sa primjerenim vladanjem ukoliko nisu ostvarili pravo na stipendiju po istom osnovu.
- (3) Pravo na nagrade shodno odredbama ovog Pravilnika imaju:
- e. studenti dobitnici najvećih priznanja u skladu sa ovim Pravilnikom, ostvaruju studenti do 27 godina starosti sa prebivalištem na području Općine Stari Grad Sarajevo.
- (4) Pravo na nagrade shodno odredbama ovog Pravilnika imaju:
- f. učenici/studenti državljani Bosne i Hercegovine sa prebivalištem na području Općine Stari Grad Sarajevo, koji imaju status perspektivnog sportiste Kantona Sarajevo imaju pravo na nagradu za ostvaren rezultat u prethodnoj godini (prethodna takmičarska sezona) i to za ostvareno I, II ili III mjesto, pojedinačno ili ekipno.
- (5) Nagrada za postignute rezultate, osvojeno mjesto i utvrđeni plasman je novčana i ovisi od nivoa takmičenja.
- (6) Ukoliko je učenik na jednom takmičenju osvojio više mjesta u obzir se uzima najbolji postignuti uspjeh na jednom takmičenju.

III – POSTUPAK DODJELE NAGRADA

Član 4. (Postupak dodjele nagrada)

Postupak dodjele nagrada vrši se na osnovu dobivenih podataka od osnovnih, srednjih škola i visoko – školskih ustanova na osnovu poziva kojeg nadležna općinska služba šalje osnovnim, srednjim školama i visoko – školskim ustanovama, te ličnim zahtjevom za nagrađivanje kako slijedi:

- (1) Za učenike osnovnih škola nadležna općinska služba upućuje poziv na kraju školske godine osnovnim školama na lokalitetu Općine Stari Grad Sarajevo za dostavljenje podataka o nagrađenim učenicima osnovnih škola, u skladu s članom 3. ovog Pravilnika.
- (2) Za učenike srednjih škola nadležna općinska služba upućuje poziv na kraju školske godine srednjim školama na lokalitetu Kantona Sarajevo za dostavljanje podataka o nagrađenim učenicima srednjih škola u skladu s članom 3. ovog Pravilnika.

- (3) Podatke o nagrađenim studentima/dobitnicima najvećih priznanja Univerziteta u Sarajevu obezbjeđuje Općina Stari Grad Sarajevo putem nadležne općinske službe za obrazovanje putem javnog poziva. Javni poziv se raspisuje u prvom kvartalu tekuće godine.
- (4) Učenik/student koji ima status perspektivnog sportiste Kantona Sarajevo za ostvaren rezultat u prethodnoj godini (prethodna takmičarska sezona) zahtjev za nagrađivanje učenik/staratelj podnosi lično nadležnoj općinskoj službi za obrazovanje.

Ukoliko nadležna općinska služba zaprimi lični zahtjev učenika/studenta za dodjelu nagrade, isti će provjeriti sa nadležnim institucijama, te ukoliko budu ispunjeni uslovi ovog Pravilnika isti će biti uzet u razmatranje.

IV – KOMISIJA I NAGRADE

Član 5. (Potrebna dokumentacija)

Nakon dostavljanja podataka od osnovnih, srednjih škola, te podataka dobivenih putem javnog poziva nadležna općinska služba će od predloženih kandidata zatražiti dokumentaciju s ciljem ostvarivanja prava na nagradu kako slijedi:

- 1) Potvrda/obavještenje o prebivalištu iz CIPS-a (ne starija od šest mjeseci);
- 2) Potvrda o redovnom školovanju;
- 3) Dokaz o ostvarenom uspjehu odnosno učešću na takmičenju izdato od strane nadležnih institucije resornog ministarstva - škole, strukovnog saveza;
- 4) Dokaz o dodijeljenom priznanju Univerziteta u Sarajevu;
- 5) Drugi neophodni dokumenti (izjave odgovornosti, kopije žiro računa).

Član 6. (Komisija)

- (1) Općinski načelnik posebnim Rješenjem imenuje Komisiju za izbor kandidata dobitnika nagrada učenika/studenata za tekuću godinu koja prati sve uslove nagrađivanja po ovom Pravilniku (u daljem tekstu Komisija).
- (2) Komisija se imenuje na period od 12 (dvanaest) mjeseci i broji 5 (pet) članova, od kojih je jedan predsjednik Komisije. Komisiju čine 3 (tri) člana koji su državni službenici i 2 (dva) člana koji su predstavnici Općinskog vijeća Stari Grad Sarajevo.

Član 7. (Obaveze Komisije)

- (1) Komisija je obavezna da pregleda pristigle zahtjeve, utvrdi činjenično stanje te sačini prijedlog za dodjeljivanje nagrada.
- (2) Prijedlog za dodjeljivanje nagrada Komisija dostavlja Općinskom načelniku.
- (3) Općinski načelnik donosi Zaključak o dodjeli nagrada.

Član 8.
(Iznos nagrade)

Općinsko vijeće će za svaku budžetsku godine donijeti Odluku o iznosu nagrade za učenike osnovnih i srednjih škola, za postignute rezultate iz oblasti obrazovanja, nauke, tehnike, kulture i sporta i studente dobitnike najvećih priznanja Univerziteta u Sarajevu „Zlatna i Srebrna značka“ u skladu sa raspoloživim budžetskim sredstvima.

V - FINANSIJSKA SREDSTVA

Član 9.
(Finansijska sredstva)

Za provođenje ovog Pravilnika finansijska sredstva planirat će se u budžetu Općine Stari Grad Sarajevo na prijedlog nadležne općinske službe.

Član 10.
(Praćenje i provođenje odredbi)

Za realizaciju odredbi ovog Pravilnika zadužuje se nadležna općinska služba za obrazovanje i Služba za finansije.

VI-PRELAZNE I ZAVRŠNE ODREDBE

Član 11.
(Stupanje na snagu)

Ovaj Pravilnik stupa na snagu osmi dan od dana objavljivanja u „Službenim novinama Kantona Sarajevo“.

PREDSJEDAVAJUĆI
OPĆINSKOG VIJEĆA STARI GRAD
SARAJEVO

Seid Škaljić

Broj:
Februar, 2024. godine

OBRAZLOŽENJE

Pravni osnov za donošenje ovog Pravilnika sadržan je u preambuli akta.

Razlozi za donošenje:

U saradnji sa nadležnim Ministarstvima Kantona Sarajevo, Općina Stari Grad Sarajevo provodi interes u oblasti obrazovanja i osigurava, pomaže i organizuje javne, kulturne i sportske i druge manifestacije škola, te organizuje takmičenja i smotre učenika u oblasti nastavnih i vannastavnih aktivnosti.

Općinski načelnik je na osnovu pojedinačnih zahtjeva škole, odnosno roditelja i uprave klubova i do sada pomagao odlazak na takmičenja i nagrađivao za postignute rezultate učesnike na takmičenjima zavisno od materijalnih mogućnosti općine.

Svjedoci smo da učenici osnovnih i srednjih škola koji imaju prebivalište na području naše općine u posljednje vrijeme postižu rezultate vrijedne pažnje kako na domaćim tako i na međunarodnim takmičenjima, te iz tog razloga Služba je utvrdila prijedlog Pravilnika o nagrađivanju učenika osnovnih i srednjih škola iz oblasti obrazovanja, nauke, tehnike, kulture i sporta.

U skladu sa ovim Pravilnikom, Općina Stari Grad Sarajevo bi osigurala sredstva kako bi finansijski nagradili učenika, odnosno ekipu za postignute rezultate, zavisno od nivoa takmičenja na kojem su učestvovali i osvojenog mjesta predviđenog za nagradu.

Ova materija do sada nije bila regulisana Pravilnikom ali su učenici koji su postizali rezultate na takmičenjima i za koje je upućivan zahtjev za nagradu, uvijek pozivani i nagrađivani od strane Općinskog načelnika, sa namjerom da ih motivišemo i pokažemo da općina kao jedinica lokalne samouprave cijeni njihov trud i postignute rezultate.

Potrebno je da se utvrdi način i uslovi za dobijanje nagrada za učešće i postignute rezultate kako bi dodjela nagrada bila transparentna. Cilj je motivirati učenike kako bi se takmičili i postizali rezultate, te razvijati kod djece osjećaj da će njihov uspjeh biti prepoznat na nivou lokalne zajednice kojoj pripadaju i da će biti nagrađeni za svoj trud i uspjeh.

Također, često se dešava da i pored toga što su postigli zapažene rezultate, učenici-učesnici takmičenja na većim nivoima nisu u mogućnosti organizovati put i učešće na takmičenju. Zbog nedostaka novčanih sredstava za put, za smještaj i boravak (često im nedostaju sredstva za pripremu, oprema i sl.) obraćaju se Općinskom načelniku zahtjevom za neki vid pomoći u realizaciji samog odlaska na takmičenje. U tom smislu potrebno je pružiti podršku učenicima i obezbijediti novčana sredstva za ovu namjenu.

Za poštivanje odredbi ovog Pravilnika zadužena je nadležna općinska služba, koja u saradnji sa menadžmentima osnovnih i srednjih škola, ustanova za obrazovanje i klubovima, pokreće aktivnosti vezane za praćenje uspjeha, prikupljanje podataka i dodjeljivanje nagrada učenicima koji su učestvovali na takmičenjima i koji su postigli dobre rezultate.

Finansijska sredstva za realizaciju ovog Pravilnika se planiraju u Budžetu Općine Stari Grad Sarajevo. Nagrada za učešće odnosno, postignute rezultate na takmičenju se isplaćuje shodno planiranim i raspoloživim budžetskim sredstvima.

PREDLAGAČ: OPĆINSKI NAČELNIK
putem Službe za obrazovanje, kulturu i sport